

SCRIPT OF MORNING GOJRI NEWS BULLETIN 18MAY 2026 1015HRS

مارننگ گوجری نیوز بولٹین 18 مئی 2026

یوہ آکاشوانی جموں ہے عبیدالرحمان تیں خبر سُنو۔

LG SELF ENUMERATION

لیفٹیننٹ گورنر منوج سنہا نے گزشتہ روز اپنی خود شماری مکمل کی جس نال جموں کشمیر غے اندر مکانات غی فہرست سازی تے مکانات غی مردم شماری غی کاروائی شروع ہوئی۔ ایل جی موصوف نے تمام شہریاں نانہہ 31 مئی توڑی خود شماری مانہہ بڑھ چڑھ غے حصو لین غو کہیو۔ اس خود شماری مانہہ لوکاں گا رہائشی مکانات غی حالت گھریلو اثاثہ دیگر سہولتاں غے نال نال صفائی ستھرائی پین غا پانی بجلی انٹرنیٹ ذرائع آمدرفت تے تعمیراتی نوعیت غے متعلق جانکاری تے خود شماری اکٹھی کی جے غی۔ اسے طرح خودشماری غو دوجو مرحلو جس مانہہ آبادی غی گنتری کی جے غی۔ اس غی شروعات فروری 2027 مانہہ عام علاقہ مانہہ کی جے غی۔ جد کہ جموں کشمیر جیسا برف باری آلا علاقہ مانہہ مردم شماری ستمبر 2027 مانہہ منعقد وے غی۔ اس ضمن مانہہ زمینی سطح ور 27 ہزار تیں متا عملہ نانہہ تعینات کیو جارہیو ہے جن مانہہ مردم شماری کرن آلو عملو تے نگران عملو شامل ہے۔ تانجے خود شماری تے مردم شماری غو عمل آسان طریقہ نال مقررہ مُدت غے اندر مکمل کیو جاسکے۔

MoS TERRITORIAL ARMY

مرکزی وزیر ڈاکٹر جتندر سنگھ نے کٹھوعہ ادھمپور ڈوڈہ کشتواڑ تے رام بن ضلع غا 7 سو مقامی نوجوانان غی علاقائی فوج مانہہ شمولیت غی ستائش کی ہے۔ یہ بھرتی 10 تیں 12 دسمبر 2025 مانہہ منعقد کرائی گئی ایک بڑی پرتھی ریلی تیں بعد کی گئی ہیں۔ جس مانہہ تقریباً 20 ہزار مقامی نوجوانان نے شرکت کی۔ امیدواران غی جانچ پڑتال تے پرتھی امتحان مانہہ کامیابی تیں بعد 16 مئی نانہہ کامیاب امیدوار کٹھوعہ ادھمپور ڈوڈہ تے رام بن مانہہ اپنی متعلقہ یونٹاں مانہہ شامل ہویا۔ ایک سماجی میڈیا پوسٹ مانہہ مرکزی وزیر نے کہیو کہ اس پہل نے نہ صرف نوجوانان غی دفاعی خواہشاں نانہہ پورو کیو بلکہ روزگار غا موقعہ وی فراہم کیا ہیں۔ موصوف نے مُنتخب امیدواران نانہہ اپنی یونٹاں مانہہ شمولیت تے بھارتیہ فوج غی وردی لان ور مبارک باد پیش کی۔ تے کہیو کہ ان نوجوانان غی لگن نا، قومی سلامتی تے مقامی ترقی مانہہ کافی بادو وے غو۔

Dy CM PWD

نائیب وزیر اعلیٰ سریندر کمار چودھری نے گزشتہ روز جموں خطہ گا تمام ضلاع مانہہ عوامی کم کاج محکمہ غا جاری پروجیکٹاں گا جائیزہ خاطر ایک اعلیٰ سطحی میٹنگ غی صدارت کی۔ اس دوران موصوف نے اس گل ور زور پایو کہ محکمہ غا جاری تمام کام کاج اعلیٰ معیار غا ہونا چاہیے تے مقررہ مدت غے اندر مکمل ہونا چاہیے۔ اس دوران موصوف نے افسران نانہہ ٹینڈرنگ مانہہ تیزی لیان کم نانہہ وقت رہتاں مکمل کرن تے خراب مال استعمال نہ کرن غی تلقین کی تے خلاف ورزی کرن آلاں غے خلاف سخت قانونی کاروائی گو حکم جاری کیو۔ آر اینڈ بی، پی۔ایم۔جی۔ایس۔وائی، ایس۔ای۔ایس۔سی۔آئی تے دیگر سکیمیاں غے تحت جاری کماں گو جائیزو لیتا واں موصوف نے شفاف موثر تے عوام متعلق ترقی وستے حکومت غا عزم نانہہ دہراہوجس غو مقصد پورا خطہ غے اندر بُنیادی ڈھانچہ نانہہ مضبوط بنانو تے عوامی خدمات غی فراہمی نانہہ مزید بہتر بنانو ہے۔

RANA MENDHAR

جل شکتی گا وزیر جاوید احمد رانا نے گزشتہ روز پونچھ ضلع غا سرحدی علاقہ مینڈھر غا دور دراز علاقہ مانہہ 57 اشاریہ 98 کروڑ روپیاں گا ترقیاتی پروجیکٹاں غی شروعات کی۔ ان اقدامات مانہہ یو ٹی کپیکس غے تحت پانی سپلائی غی 20 سکیم، آبپاشی تے سیلاب ور قابو پان غو کم کاج تے چھترال نالہ ور گڈیاں غا پُل غی تعمیر تیں علاوہ پین غا صاف پانی پنچائتی تے سڑکاں غی حالت نانہہ بہتر بنان متعلق پروجیکٹ شامل ہیں۔ مقامی لوکاں نال خطاب کرتا واں موصوف نے پانی گا بہتر انتظام تے بُنیادی ڈھانچہ غی مشترکہ ترقی ور زور پایو۔ ان منصوباں گو مقصد زندگی غا معیار نانہہ بہتر بنانو، ذراعت غی ترقی تے دور دراز علاقہ مانہہ سماجی تے معاشی ترقی نانہہ یقینی بنانو ہے۔

MOUNGRI MELA CONCLUDED

ضلع ادھمپور غی تحصیل مونگری مانہہ 3 روزہ تاریخی شیو پاروتی مونگری میلو گزشتہ روز روایتی جوش و خروش نال اختتام پزیر ہوئی۔ اس میلہ مانہہ 60 ہزار تیں متا عقیدت منداناں نے شرکت کی۔ جس نال علاقہ غے اندر فرقہ وارانہ ہم آہنگی تے اتحاد غی مچال قائم ہوئی۔ اس دوران محکمہ اطلاعات تے مقامی فنکاران غی ثقافتی پیش کش تے مقامی لوک رقص تے گان بچان نال لوگ کافی محضوظ ہویا۔ ضلع

انتظامیہ نے اس میلہ کے دوران حفاظتی صورتحال ، ٹریفک بجلی پانی طبعی سہولیات سے دیگر ضروری اشیاء غی فراہمی نانہہ یقینی بنایو۔

REASI GHARAT

ریاسی غا ماری گراں مانہہ 2 سو سال پرانو گھراٹ بغیر تیل سے بجلی گا استعمال تیں عوامی خدمت کر رہیو ہے۔ صرف پانی ور چلن آلو یوہ گھراٹ دانا پیسن غو ایک بہتر ذریعو ہے سے ماحول دوست وی ہے اس نال مقامی خانداناں نانہہ ایندھن سے بجلی غا خرچہ بچان مانہہ وی مدد ملے۔ اس گھراٹ غا عمل استعمال تیں علاقہ یاه مل روایتی انجنرینگ سے پائیدار زندگی گو ایک ثبوت ہے۔ جس نال یوہ ظاہر وے کہ ماحولیاتی تحفظ نانہہ فروغ دین مانہہ پُرانا طریقہ کتنا کاریگر تھا۔ یاه چکی گراں آلاں وستے روزی روٹی غو ایک بہترین ذریعو ہے۔

JK GIRLS TEAM

قومی اسٹیج ور شاندار کامیابی گو جشن مناتاں واں جموں کشمیر گرلز ٹیم نے شملہ مانہہ منعقد تیجی شمالی روزن رول بال قومی چیمپین شپ مقابلہ 2026 مانہہ کانسہ گو تمغو حاصل کیو ہے۔ جموں کشمیر کھیڈ کونسل نے کھلاڑیاں غی اس کامیابی ور مبارک باد پیش کی ہے سے اُن غی محنت نظم و ضبط سے عزم نانہہ سہرایو ہے۔ اس دوران مزکورہ کھیڈ مقابلہ گا چیف کوچ ایم اشرف دیجو غی وی خصوصی تعریف کی گئی۔ کونسل نے اس کامیابی نانہہ آئیندہ مستقبل وستے ایک حوصلہ افزاء شروعات قرار دتو ہے سے یو ٹی غے اندر کھڈاریاں غی حمایت سے کھیڈاں غی ثقافت نانہہ مضبوط بنان وستے اپنا عزم نانہہ دہرایو۔

NEWS READ BY ABAID UR REHMAN
NEWS EDITOR ABHILASHA SHARMA
DEO NUSRAT
SKILLED RAJAT